



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim


Instagram tiryimiyim@aolima

YouTube tir yimiyim

TAPAK 7

Assam CM-i OC ajak anogo 15 shia health check-up asütsü tuyur

CoWIN ya linük ajak nem lapoktsütsü: PM Modi



VOL. XVIII NO. 262 (ADOK 262) DIMAPUR

SANGTENNÜ (TUESDAY)

CHITENI (JULY) 06, 2021

₹ 5.00

## BJP Nagaland-i COVID-19 awareness campaign tenzükogo

**Kohima, July 5, 2021 (TYO):** Nagaland State BJP Unit-i Hombarnü "COVID Awareness Campaign" tenzükogo.

Tanü Kohima nung Vice-President aser Campaign Convenor Kevidezo Peter Rutsa-i iba sentong tenzükja liasü.

"Covid wara tanabuba nung State BJP Nagaland-i mapa aika inyaka arur. Onoki public yaritsü aser kümzükä ayutsü atema inyaka aruba mapatem rongnung COVID Awareness Campaign ya ka lir" ta Rutsa-i ashi.

"State BJP-i public nem osang tejangja metetdaksütsü atema iba campaign tenzük. National President JP Nadda aser

State BJP President Temjen Imna Along na tetuyuba kübok iba sentong agir" ta Rutsa-isa shisem.

Nagaland State BJP-i awareness campaign nung mezüngbuba shilem ama pamphlets 3200 menüngogo aser ibaji BJP karyakarta temi district ajak nung alemtsü.

"COVID Awareness Campaign" tenzükba sentong nung mendenji State Secretary & Campaign member Zaveyi Kezo liasü, State Co-Chief Spokesperson Nini Cheng-i temoatsü meshia sarasadem aser BJP Spokesperson W. Ngampa Konyak-i anküp tepela o jembi.

## Naga Hoho-i AFSPA agientsü akhanger

**Dimapur, July 5, 2021 (TYO):** Naga civil society tem aser human rights activist temi tanen maka mepishia aruaka India sorkari Naga tesemtem nungi Armed Forces (Special Powers) Act 1958 (AFSPA) magienba atema jashir ta Naga Hoho-i tanü metetdaksü.

"Alima nung democracy linük tulutiba nung AFSPA ama tashiyim ozüng amshitsü nüngdak madoker. Naga nung pei sasa liteta aotsü atema inyakba ya kiralongraba mesüra balaka razüka aoba den demedangtsü makok. India sorkari Naga yimten putiotsü balaka aser democracy ka nung tashiji nübor ket nung lir

ta agizükogo" ta Media Cell, Naga Hoho-i sangdong ka nung ashi.

Indian Army-i küm roker tema Naga nung madak tashiyim inyaka arur. Indian Army-i tanur aser kaketshirtem dang taochi mesayur. Tesüiba mapang Assam Rifles-i school kaketshirtem khasetogo aser tai maketba public reshikangshio, ta Naga Hoho-isa metetdaksü.

India sorkar aser Naga Political Groups (NPGs) tsüngda tenangzüktep balala agia yimjung olemtepa agia arur. Tangbo Naga nung teresemtem nung tensa süngjema lir anungji AFSPA agientsüla, ta Naga Hoho-isa takhangba agütsüogo.

## WC, NNPG-i kuli kecha melii aitsür: NSCN/GPRN

**Dimapur, July 5, 2021 (TYO):** Naga nungeri aginüba ama NSCN/GPRN-i yimjung aser tesünep bener arutsü atema nendaka inyaka arur saka WC, NNPG-i kuli kecha melii onok aitsür, ta Addl. Secretary, MIP NSCN/GPRN, Pilato Wotsa-i tanü metetdaksü.

Nübor temi asen lima nung yimjung aginüba ama NSCN/GPRN-i telemtepa agia olemtep nung aden, saka WC, NNPG-i aitsüba ama onok temai adokba masü, ta Pilato Wotsa-i sangdong ka nung ashi.

NSCN/GPRN-i tensa raksatsütsü mesüra terata adokdaksütsü atema masü saka

India sorkari jangjangja ashiba ama telok ajak dena telemtepa ka agitsü tangatetba nung shilem agir, ta paisa ashi.

"NNPG-i tangar dak tai aputsü memerangi, asen lima nung yimjung bener arutsü atema inyaksü imlar. Tangar dak tai tongloksüba ajanga masü saka sendaka alir ajak agizükba ajanga dang yimjung bener arutetsü" ta Addl. Secretary, MIP-isa metetdaksü.

Naga nungertemi kin mesüra yimten telok telemsa melii asen lima nung yimjung aser tesünep bener arutsü atema mapa inyaker. Naga nungeri santem rongnung shitsükji shiba'ar meteta lir, ta Pilato-isa ashi.

## Jul 9 nung Core Committee senden amentsü

**Dimapur, July 5, 2021 (TYO):** July 9, 2021 nü Parliamentary Committee on Naga Political Issue indang Core Committee senden ka amentsü.

"Sendenji anepdang 11:00 ako nung Rhododendron Hall,

Chumukedima Police Complex, Dimapur nung alitsü. Anungji Core Committee züngsem ajak adentsü mepishir," ta Member Secretary, Parliamentary Committee on Naga Political Issue, Neiba Kronu-i sangdong ka nung ashi.

## Totzü aser LPG atema lungkak aitba nung shilem agitsü mepishir: NPCC Küm 6 tsüngda Excise duty 307% aser State VAT 68% ajungketogo

**Dimapur, July 5, 2021 (TYO):** AICC-i July 7 nungi 17, 2021 tashi linük ajungalen petrol, diesel aser LPG nung jenjang kanga atuba anema timi lungkak aittsü telemtepa agiogo, ta NPCC President, K. Therie-i ashi.

"Iba sentong ya Covid-19 SOPs kübok agitsü anungji Civil societies, Chamber of Commerce, Trade Unions, Associations aser temolungertem shilem agitsü mepishir," ta K. Therie-i tanü metetdaksü.

"Lungkak aitba ya social media, posters, banners aser stickers ajanga agitsü aser sorkar dang Excise duty, VAT aser Covid-Cess meyipa agitsü temepishiba agütsütsü. Onokisa demand letter nung sign bendantsü aser ibaji Governor dangi yoktsü. Shidi nungji fees,

donation, contribution & extortions azüoktsü atema Independent Price Commission aser High Power Committee tentetsü atema takhangba agütsütsü" ta NPCC president-isa ashi.

2014 nungi 2021 tsüngda Excise duty 307% aser State VAT 68% ajungketogo. Iba denji Covid Cess talila agir. Kasa mapang LPG jenjang 100% tema tuogo aser küm trok tsüngda Super Kerosene Oil litre nung Rs.15 aliba nungi Rs.39 ajungketogo, ta paisa metetdaksü.

Linük nung petrol, diesel, LPG aser SK Oil nung jenjang kanga atuba ajanga nisung shia rongsenkettsüng tsütsü timtem ajurur. Anungji sorkari jenjang alutsüla. Wara aser lockdown ajanga tensa tamajung nungi

tamajungtiba kümogo aser nisungtem mapa inyakkak mali kümogo, ta Therie-isa ashi.

India sorkari MSME collateral free loan policy tenzüktsüogo saka Nagaland nung Bank aser Financial Institution temi ibaji inyaksü memolungba den state sorkaria SARFAESI Act magizüker, ta paisa ashi.

Talisa, taküm tzüngluruwa menuba ajanga tensa tamajung ajurutsüsa lir aser külen sorkari jenjang atuba mazüoker. Sorkari Essential Commodities Act of 1955 mezüngdang ama bilemer. Külen, sorkari tashiyim agi sen saruba azioktsü atema Society Registration Act 1860 azüngtsüla aser ibaji mapa küma inyaksüla, kechiyong Nagaland nung society noklang aikati tax, fee agiba manener, ta K. Therie-isa metetdaksü.

## COVID-19 Nagaland: Nisung 40 dak putet; 81 taneptsü angu

**Kohima, July 5, 2021 (TYO):** Hombarnü Nagaland nung nisung 40 dak COVID-19 putet aser nisung 81 taneptsü angu.

"Tanü nisung 40 dak COVID-19 putet. Parnokji Dimapur nung 15, Mokokchung nung 14, Kohima o Peren nung asemsem (3), Mon o Wokha nung anana (2) aser Phek nung 1 lir. Parnok züngsema nisung ajak agi 25,559 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Maneni, tanü COVID-19 puteta alir nisung 81 taneptsü angu. Parnokji Dimapur nung 36, Mokokchung nung 19,

Kohima o Phek nung tii (8), Zunheboto nung 4, Peren o Tuensang nung anana (2) aser Mon o Wokha nung kaka (1) lir. Parnok züngsema taneptsü angur 23,158 kümogo" ta paisa metetdaksü.

Tanü taneptsü angurtem züngsema Nagaland nung COVID-19 nungi taneptsü angur 90.61% lir aser tang nisung 1,192 anepaludar, ta Dr Kikon-isa ashi.

"Nagaland nung COVID-19 alitsü akok ta temolung meleme bilemba sample 2,32,043 tendangogo. RT-PCR ajanga 98,456, TrueNat ajanga 62,516 aser Rapid Antigen Test ajanga 70,071 tendang" Dr Kikon-isa

shisem. "Nisung 4,68,202 nem COVID-19 vaccine indang dose 5,36,257 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,202, healthcare workers 15,823, arishi küm 45 ser temapur 1,56,086 aser arishi küm 18 nungi 44 tsüngda alir 2,36,091 lir" ta paisa ashi.

"Vaccine agirtem rongnungji parnok 68,055-i dose anaprong agiogo. Parnokji frontline workers 29,376, healthcare workers 10,641, arishi küm 45 ser temapur 28,014 aser arishi küm 18 nungi 44 tsüngda alir 24 lir" ta Dr Thurr-isa metetdaksü.

## Samuel Sangma pa sasa soset: Delhi Police

**New Delhi/Shillong, July 5, 2021 (Agencies):** Hombarnü DCP Southwest-i Nagaland nungi Samuel aser Rosy Sangma na asüba indang bushisüngdangba osang lemsatepdang Samuel ya soseta asüba kuli ngutetogo ta ashi.

"Onoki Samuel asüba nung taittsü aketba kuli kecha mengutet. Pa soseta asüba ama lir. Onoki post-mortem report atar aser temolung malemetsüsa kuli kar dang ngura mapa inyaksü" ta DCP Southwest-i osangbener dang ashi.

"Gurugram nung Garo

nunger lanur ana taittsü keta asüba timi bushisüngdangtsü asütsüla" ta Meghalaya Governor Satya

### Meghalaya Governor-i Union Home Minister dangi shidi zülü

Pal Malik-i Union home minister Amit Shah dangi shidi zülüogo.

Tura MP aser taoba Union minister Agatha Sangma-ia Union home minister Amit Shah dang tawa tu Dimapur nungi lanur ana asüba bushisüngdangtsü atema shidi ka zülüogo.

"North East nungi lanur ana taittsü keta asüba media osangtem

Meghalaya Governor-i angazükogo aser ano pa dangi iba atema shidi zülüba nguogo" ta Raj Bhavan, Shillong-i sangdong ka nung ashi.

Nagaland sorkaria Delhi Police dang Dimapur nungi lanur ana asüba bushisüngdangtsü atema osang sangoktsüogo.

Külen, Additional chief secretary aser Chief Resident Commissioner, Nagaland House Delhi, Jyoti Kalash-ia Additional commissioner of Delhi Police dangi tekaratiba nung bushisüngdang süang ta mepishia shidi ka zülüogo.

## Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aittsüsa kichiba (window & ventilation) lapoka yuang. Akok tashi süngjanglijang aser süngolemba agi tua chiyongtsü tajung chiang aser tzü aser juice jemang. Pei meyong mobile phone, kumesü aser toothbrush nunger ama melentepa tamshi. Mozü achitsü agüja lira, aji shitak chiang. Tango junga mesashitetba, teku ashiba, aketba aser temang metaba timtem lira yakta doctor bushiang.



# Minister Kronu-i Pfutsero A/C nem süngjangtong agütsü



Pfutsero nung July 5, 2021 nü süngjangtong lemtsüba mapang tangokba noksa ka nung Minister Neiba Kronu aser ketdangsürtem angur.

**Dimapur, Chiteni/July 05 (TYO):** Alima nung tzü-mopung melenshia aoba nung teyari agütsütsü aser COVID-19 ajanga kongshiba mapang teyari angutsü angutsü nükjidong nung Minister, Planning & Coordination, Land Revenue and Parliamentary Affairs, Neiba Kronu ajanga July 5, 2021 nü Phek district kübok Pfutsero Assembly Constituency nung aliba yimsüing 12 nem sen lakh 10 jenjang süngjangtong lema agüja liasü.

Süngjangtong ya Avocado, Persimmon, Chestnut, Tamarillo, Yongchak, mozü ama amshiba (lengotshe) nungertem liasü.

Asenok aliba alima aser tzü-mopung wazüka ayutsü ya kanga tongtipang kumogo, ta Minister Kronu-i iba sentong nung ashi.

Iba sentong ya Local Area Development Programme (LADP) ajanga tzü-mopung melenba anema raratsü aser rongsenketsüing ajungkettsü mechi ayongzük, ta pai ashi.

Tzü-mopung wazüka ayuba den külemi nisung takum liyonga aotsü ya kasa tongtipang lir, ta

ashi. Nagaland densema Himalayan range ya süngdong-lidong tsütsü takar aser ali lanu lir, anungji süngdong-lidong tabu balala adokdaksür, ta ashi.

2014 küm Horticulture Department nung Parliamentary Secretary ka ama küm ka shi inyakba bilemteta jembiba mapang, Nagaland-i linük nung danga tesemtem aser alima nem kechi agütsütettsü ta asadanga alima tesem balala aser South India semdanga jaja liasü, ta pai ashi.

Shishilempaba tsütsü aluyimertem yaritsü atema Entrepreneur Association tejakleni aruba atema pelar, ta Minister-i ashi.

Jenjang aketba süngjanglijang saka mela-mela meraksaba nung tenük yoka tsünütsüla, ta pai ashi.

Süngmok aser bingana (tomato) ua market value tajung lir, anungji item amala ya amshitsüla, ta pai ashi.

Tarutsü anogotem nunga iba amala project ya inyaksü kanga tongtipang lir, anungji nüburtemi Pfutsero ya "Land of fruits and plentiful" kumdaktsütsü atema

inyaktsüla, ta Minister Kronu-i ashi.

"Rongsenketsüing ajungkettsü atema danga district temi tatishitsü amshitsüa asen constituency nung süngjangtong atemba yimya sübatsüla," ta pai ayongzüka liasü.

Rongsen tsütsü teyari agütsüba indang jembiba mapang, iba project ya 2019 küm Minister Kronu-i tenzükja liasü, ta Chief Executive Officer, Entrepreneurs Associate, Neichute Doulo ajanga ashi.

Iba project ya Pfutsero kisüing atema masü saka danga legislator temia inyaktsüla, koba agi state ajunga ajangzüksü, ta pai ashi.

Tanü süngjangtong 22,000 agütsüba nungi aluyimer temi züsentetba ajak EA ajanga alitsü, ta pai ashi.

Paisa aluyimer dang teti sorkar dak metaloka melie market bushitettsü ajungshia liasü.

Iba sentong nung EA Zonal Head Cukhoyi Chiero menden liasü, aser taoba mapang Pfutsero Town Council nung chairman inyaka alisang Dingulo Khutso-i tepela o jembia liasü.

# Security Forces-i temesepba mozü shibelener ka apu

**Dimapur, Chiteni/July 05 (TYO):** Security Forces temi police den lungjemer operation ka July 5, 2021 nü general area Samzuiram, Peren nung agiba mapang temesepba miim mozü shibelener ka pua liasü.

Osang tejangja kar nung

ajemdaker Security Forces temi State Police den lungjemer operation ka agiba mapang Peren district kübok Samzuiram tesem nungi temesepba miim mozü shibelener ka pua pa ket nungi sen lakh 1.98 jenjang Marijuana takong seret 6.6 aser

Raw Marijuana seret 13 nguteta liasü.

Pua alisang den pa ket nungi ngutetba temesepba mozü ya maneni asüngdangyatsü atema Jalukie Police Station, Peren nem agütsüogo, ta sangdong ka ajanga ashi.



Hombarnü Tuensang district kübok Wui yimsüing atema mini truck ka nung PHH jang bener aoba mapang Sanglao aser Wui yimsüing tsüingta Joklo apu nung mükepoka noksa nung angur.

# Nagaland nung Under Trial Prisoner 34 chioktsü lemtet

**Kohima, Chiteni/July 05 (TYO):** Nagaland State Legal Services Authority (NSLSA) tawabangba kübok District Legal Services Authorities (DLSAs) ajanga pei district kübok April-June quarter atema June ita Under Trial Review Committee (UTRC) indang 2 buba Quarterly Meeting agia liasü.

Principal/District & Session Judge, Chairman; Chief Judicial Magistrate cum-Secretary, aser Deputy Commissioners, Superintendent of Police, Jail Superintendent, DLSA nungi okatsürtem züngsem süa aliba Committee ajanga Under Trial Prisoners tem jenjang asadanga sülen Nagaland nung Unter Trial Prisoner 34 tashi tepuokdak nungi chioktsü ashi. COVID-19 tashidak wara mapang temang anepalutsü, legal aid counsel aser danga onüktem asadanga jembia liasü.

Mon DLSA UTRC senden ya Deputy Commissioner, Mon indang Conference Hall nung June 25 nü mena liasü aser Narcotic Drugs and Psychotropic Substances Act, 1985 (where persons accused of section 19 or section 24 or section 27 A or for offences involving commercial quantity) indang Section 36 A kübok UTPs pongu chioktsü temsüa lir, ta ashi, shirnok indang bushisüingdanga anogo 60/90/180 tashinung metembangteti ali.

Tang timtem ajurua aliba mapang DC Mon, Thavaseelan K, IAS ajanga UTPs nem medical teyari agütsütsü benoka liasü. Committee ajanga UTPs tem lemsaba indanga jembia, koba senden mamandang renemer liasü. District jail, Mon nung UTPs 62 aser mapa tamajung inyakba nung aibelenogo ta sangdonga alir nisung 15 lir.

Mokokchung District Legal Services Authority pur quarterly UTRC senden ya District Court nung June 25 nü mena COVID-19 tashidak nungi jembia alitsü onüktem jembia aser jail ketdangsür dang tepuokdak alirtem kanga junga mita repringtsü aser chioktsü ajungshia liasü.

COVID-19 tashidak agi menepaka timtem magütsüba UTPs aser mapa tamajung inyakba nung aija alirtem ayutsü atema COVID care centre tajung ka jangjatettsü atema nungloksü.

Tatok agütsütetba aibelener UTP ka jangjateta bail petition benoktsü nungloksü. Tepuokdak alir nisung tain ka jangjateta jail ketdangsür dang mapang shidang nung temang anepalutsü ashi.

Kiphire District Legal Services Authority pur 2nd Quarterly UTRC senden ya July 03 nung mena liasü aser UTP ka Judicial Custody nung ita trok sür anogo 18 aliba chioktsü lemtet aser ka

temang anepalutsü lemtettsü.

COVID-19 mozü agütsü nungnangba indang onük iba senden nung jembia aser iba mozü indang awareness junga agütsütsü lemteta liasü. District Jail, Kiphire nung July 03 tashinung UTP pezü aser Convict ka yua lir.

Tuensang District Legal Services Authority pur senden ya May 29 nü Superintendent of Police, District Jail, Tuensang indang office nung mena liasü aser COVID-19 care centre agütsütsü indang jembia.

District Jail, Tuensang nung UTPs 29 lir aser parnok rongnung UTP ka nem angati Legal Aid agütsütsü lemteta liasü.

June 24 nü Longleng District Legal Services Authority pur 2nd Quarterly UTRC senden video conference ajanga mena liasü. Committee ajanga UTPs nisung tenet chioktsü lemtet. Nisung ana nem Legal Aid Counsel agütsütsü aser ana chioktsü lemteta liasü.

Phek nung Committee ajanga UTPs nisung trok jangjateta bail mela, saka parnoki khuret abentsü nisung (surety) magütsütetba ajanga mechioki liasü. Taoba HPC senden nung UTPs nisung ter tashi parole nung chioka liasü aser Phek District Jail nung nisung 15 lir.

District jail nung Chief Medical Officer ajanga COVID-19 tendangtsü atema Medical doctor ka lemezüksü, aser tepuokdak shiranger kata meliasü. Parnoki iba tepuokdak tesem semdanga liasü.

Dimapur nung June 14 nü UTRC senden Principal District & Session Judge indang Chamber, Dimapur nung amenba mapang Central Jail Dimapur aser District Jail Dimapur ajanga agütsüba UTPs tenüngtem asadanga aser Central Jail nungi UTPs nisung 11 aser District Jail nungi nisung asem bail nung chioktsü lemtettsü.

Wokha District Legal Services Authority pur 2nd Quarterly UTRC senden ya District Jail, Wokha nung June 9 nü mena liasü. Ajisüaka yangji alirtem temang anepalutsü mesüra UTP mapang süia ayur aser bail nung chioktsü temsüa aliba UTP kata meliasü. Tang District Jail Wokha nung UTPs 13 yua lir.

Zunheboto District Legal Services Authority pur 2nd Quarterly UTRC senden ya District Jail Zunheboto nung July 2 nü mena liasü.

Tang District Jail Zunheboto nung UTPs 16 aser Convicts asem yua lir aser parnok ajak ya bail nung chioktsü temsüa mali. Ajisüaka UTPs pur atema COVID Care Centre temeja ka amenoktsü atema senden nung jembia liasü.

Kohima aser Peren district nung UTPs chioktsüpur kata meliasü.



Hombarnü Border Security Force (BSF), Meghalaya Frontier-i Dawki nung magnets 1190 tashi puogo. Dawki yim ya Indo-Bangladesh arrtsü anasa lir aser sepaitemi apuba magnets ji Bangladesh nungi bener aruba liasü aser Rs 2,41,150 alang lir ta BSF-i metetdaksü. (Jowai, July 5)

# Assam Congress-i CM Sarma aser Minister Hazarika na aitsür

**Guwahati, July 5, 2021** Assam Congress president, (Agencies): Sivasagar MLA Ripun Bora-i ashi.

Akhil Gogoi Gauhati Medical College Hospital (GMCH) nung amongba atema Chief minister Himanta Biswa Sarma aser state minister Pijush Hazarika nati pa lutsüba aitsür ta Assam Congress-i metetdaksü.

"Medical Board Report aser NIA-i ashiba ama Akhil Gogoi GMCH nung among. CM aser pa junior Minister kati iba olen jembiba ajanga NIA court ama ozüng amertem hao ta maliba sayur" ta Assam Congress-i ashi.

"GMCH ya BJP sorkar kübok lir. Anungji, kechiba iba ken o bushisüngdangtsü atema tetuyuba magütsür? Iba inyakyim ajanga parnoki mapa shitak meinyakba sayur" ta

UAPA kübok ken o ana benoka angadamba mapang MLA Akhil Gogoi-i GMCH nung ita 18 amongba atema Assam chief minister Himanta Biswa Sarma aser state minister Pijush Hazarika nati ashishitep.

Assam Congress-isa state sorkar dang kanga ajungbena ozüng alema nashi aser mozü shibelenba anema mapa inyakba asüngdang.

"Taoba BJP sorkar mapanga kasa maparen inyaka liasü. Anungji, tang aliba CM-i kechiba iba mapang tu mapa kecha meinyak? Kasa sorkar nung pa-a Minister tongti ka inyaka liasü. Taoba sorkar nung pa-a densema liasü" ta Assam Congress-isa metetdaksü.

# Assam CM-i OC ajak anogo 15 shia health check-up asütsü tuyur

**Guwahati, July 5, 2021** (Agencies): Assam chief minister Himanta Biswa Sarma-i tanü police station nung officer-in-charge (OC) ajaki pei anasa aliba mozü kidang anogo 15 shia health check-up asütsü tetuyuba agütsüogo.

Hombarnü Srimanta Sankardev Kalakshetra, Guwahati nung Officers-In-Charge (OCs) den senden ka amendang Chief minister Sarma-i osang metetdaksü.

Senden nung mendenji CM Sarma liasü aser 'redefining policing standards in Assam' omen nung ajemdaker Assam nung aliba police station ajak

nung OC tem atema mapa tasen aika inyaksü metetdaksü.

Assam sorkari OC shia nem gari kaka agütsütsü aser OC kar gari nung senzusenbongtsü mesademra motorbike ka agütsütsü ta Sarma-i ashi.

State sorkarisa police station shia nem Rs 2.5 lakh agütsütsü aser quarter yanglutsü kimung aliba police station nem senotsü lezmüksütsü. Ano, generator facility maliba police station nem generator agütsütsü, ta paisa metetdaksü.

Chief Minister Sarma-i OC tem dang süpokrem agiba anentsü aser mapang magii

police verification reports agütsütsü aser tekaratiba nung chargesheets yanglutsü tetuyuba agütsü.

Assam nung nashi ayaba ken o khenyongi malitsüla, ta Sarma-isa ashi.

"Police station ajak nung FIR filing aser tanga maparen atema computer asemsem agütsütsü. Tang asenoki iba mapa tenzüker aser ita trok shia onoki OC tem den ajuruteptsü" ta Sarma-isa metetdaksü.

"Iba mungdang ya balaka aser otsütsütsü lir" ta Assam director general of police (DGP) Bhaskar Jyoti Mahanta-i ashi.

# Kuki Revolutionary Army-i Covid19 vaccine agitsü ajungmesor

**Imphal, July 5, 2021** (Agencies): Manipur aser Centre sorkartem den yimjung olemtep aliba Kuki Revolutionary Army (KRA)-i parnok telongtet kübok aliba yimtsüngtem dang Covid19 indang vaccine agitsü metetdaksüogo.

"Yimer ajak vaccine mezüng agiba yim nem Rs 1 lakh, tanabuba yimtsüng nem Rs 60,000 aser tasembuba yimtsüng nem Rs 40,000 senpettem agütsütsü" ta Kuki

National Organization (KNO)/ KRA-i ashi.

"Nisung aikati vaccine agitsü nungnangba mapang ka nung KNO/KRA-i Chiefs aser Youth Clubs dang nübortem tekaratiba nung vaccine agidaksütsü atema ayongzüker" ta parnokisa ashi.

"Nenok ajaki vaccine agiang aser Covid maliba Saikul ka kümdaksüdi" ta Information & Publicity department-i sangdong ka nung metetdaksü.

Taoba mapang MLA Yamthong Haokip-ia Saikul

Assembly constituency nung vaccine agir mezüngbuba yim asem nem senpettem agütsütsü metetdaksüogo.

Manipur nung Covid19 tensa kanga mejungi lir aser Deobarnü nisung 8 tashi iba tashidak ajanga süogo. Parnok züngsema tasür ajak agi 1196 kümogo.

Deobarnü Manipur nung nisung 643 dak Covid19 aliba putet aser parnok ya public 637 aser central paramilitary force nungi 6 lir.

# Tripura 'Start-Up Week' tenzükogo



**Agartala, July 5, 2021** (Agencies): Hombarnü Tripura Chief Minister Biplab Kumar Deb-i IT Minister Ravi Shankar Prasad den külemi 'Tripura Start-up Week' tenzüksüogo.

Hopta ka piyong agiba sentong ya start-ups ajungkettsü atema lir, ta Chief Minister Deb-i ashi.

State sorkari Tripura ya northeast tesem nung start-up hub tongti ka südaksütsü

nangzüka lir, ta paisa ashi. Iba scheme kübok infrastructure aser financial assistance den proof of concept atema Rs 10 lakh aser one-time recruitment atema 1.5 lakh agütsütsü.

Maneni, iba scheme nungsa electricity aser high-speed internet connection agütsütsü.

Tripura state sorkari taruba küm 5 tsüngda IT start-ups 100 lapoktsü sentong renema lir.



Hombarnü Manipur Chief Minister N. Biren Singh-i Kangpokpi District nung süngdong atema mapa tenzüksüsdang agiba noksa angu. Iba sentong ya Dr. Shyama Prasad Mookerjee indang Balidas divas tenüng nung inyaker. CM Biren Singh-isa Kangpokpi nung Van Mahotsava benjung nung shilem agi. Iba mapang State forest Minister Sh. Awangbow Newmai, MP(RS) Maharaja Sanajaoba Leishemba, MLA Kipgen Nemcha aser Vice President, BJP Manipur Nongthombam Nimbus nungertemi pa meina liasü.

# Mizoram nung ASF ajanga ak 9,000 tema süogo

**Aizawl, July 5, 2021** (Agencies): Mizoram kübok district 11 nungi 10 nung African Swine Fever (ASF) khuret lir aser tesüiba ita asem tsüngda ak 9,000 tema süogo, ta Animal Husbandry and ZVeterinary Science department-i metetdaksü.

District 10 nung yim 152 shi ka nung ASF tonga lir aser takü March ita nungi ak 9,172 asüba ajanga Rs. 36.68 crore tema akoksaogo, ta Deobarnü department-i ashi.

Ano, ASF agi matongba tesemtem nunga ak 699 tashi taitüsü keta asüba osang lir, ta parnokisa ashi.

ASF menatempa moudaksütsü atema ak 1,078 tepsetogo. March 21, 2021 nü

Lungsen yim nung mejangjatetba tashidak ka ajanga ak asü. Iba yim ya Lunglei district nung Bangladesh arrtsü anasa lir.

Iba ak asüba sülen Porcine Reproductive and Respiratory Syndrome (PRRS) aser Classical Swine Flu (CSF) tendang saka negative adoka liasü. Ketdangsurtemi ak indang sample ji National Institute of High Security Animal Disease (NIHSAD), Bhopal nung tendangtsü bener yok aser April 16 nü ASF ajanga asü ta asüba kuli nguteta liasü.

Assam den arrtsüa aliba Kolasib district nung dang ASF wara mali, ta Department joint director (livestock health) Dr. Lalhmingthanga-i ashi.



# TIR YIMYIM YIMOBILEM (EDITORIAL)

DIMAPUR SANGTENNÜ, CHITENI (JULY) 06, 2021

## Alima asoshi shisabolu

**T**an mapang tatsüka tsungda gari totzü jenjang petrol litre ka nung sen noklang ka dak tali akümba ya tamamangtsüka lir. Talisa yaküm küm nungi Covid-19 wara ajanga mapabo meinyaker saka gari totzü nungbo senbo tupet atur ta tua tua, petrol nung dang masü saka joko diesel nunga dena yakta litre nung sen noklang jungadoktsü. Iba yagi nisungtem talitsü jenjang tasakba kümdaktsüogo. Aji oda, tanü asenok libaliro jenjang ya bilemdangra maparen ajak gari totzü jenjang dak keta lir, kechiyong asenok gari nung jajaba dang masü saka asen nungdak ajak gari nung bener aoer aser gari nung bener arur. Iba jagi joko gari nung senzuba jenjang tuadokogo aser gari nung bener aruba oset aser chiyongtsü ajak nung jenjang tuadokogo. Ano, asen lima ama nung balaka, gari lenmanga kanga majung, anungji tangar totzü litre ter agi atongtsüba lenmang nung asenokbo totzü litre 15 agir aser garia yakta raksar, anungji item endokenraba ajakji oset aser chiyongtsü nungji temloker ayoker. Ibayongji, akhidang sen meyririjang ka agi gari nung totzü enoker jangotsü aser aonsutsü alia bener aruba o tangbo meyririjang ka jagi meperitsü. Aji oda, tsürabur shin o nung, "anübo talur, süngbo süngpet süng aser pubo putsü," ta ashiba amato, kechisarina asenok nungdak ajak nung jenjangbo tupet atur, mapabo meinyaktetter aser kidang kibong nung nungdakbo tiemba akümer ta asüba tensa tia ka nung asenok kibong aika shisabolu khuret agi nenpet nendagi. Joko, alima nung gari totzü nung jenjang ajemabo makümtsü, anungji gari totzü jenjang atuba agi asen taküm aser kibong nung tebilemtsü talila mekümdaktsüi koktettsü asoshi jet ta sentong kar apiteta inyaktü kanga nungdaka kümogo. Item sentongtem rongnung kaji, joko akok tashi gari mamshitsüla, anungji akok tashi tetsung agi mesüra lenden lima alirtembo amerlongtsü (bicycle) amshitsüla. Tetsung agi jajaba aser amerlongtsü nung senzuba jagi sen kümzükba dang masü saka temang nunga teyari agütsütsü aser alima tzü moponga metetmeteta merüktetsü, anungji asenok atemabo gari totzü nung jenjang atubaji tajangzük aser temoatsüang asütsü. Atangji, mapa ajakbo tetsung agi mesüra amerlongtsü nung jajaba agidangbo matemtsü, anungji gari nung jajatsüsa akümdang akok tashi pei gari nung masü saka bus aser taxi amala nisung aika mener jajaba gari (public transport) nung senzura, iba jagi meteta aser memeteti sen aika kümzüksü. Asenok shisatsü kanga junga mainba mapangbo asenoki gari nung senzubaji dang temeteter aser takar ta bilem, iba jagi makayonga aser memetetyonga temetetter aser takar ama sayutsü asoshi apu asüyonga gari alia amshi, saka tanü tangatetba putu nungbo ibaji meyiptepogo. Aji oda, temang anema linüba agi aser alima tzü mopong kangabo memenendaktsünüba agi takar aser temeteterteri pei gari toktsür akok tashi tetsung agi jajar. Iba jagi senotsü kümzükba dang masü aser pei temang ayongayonga akümba dang masü saka gari jajaba ajema akümba agi alima dena kanga ayonga aser mekongka akümer. Atangji, alima nung Tsüngremer shisatsü tarok bushia purapitettertemibo gari totzü jenjang atuba agi temoatsü mapangang balaka kümdaktsür, nübortem asoshi petrol aser diesel melen amshitsüsa jenjang kanga agi dalangba nung ano gari totzü tasen bushitetsü ana nung lir. Tanga alima aika nung totzü melen battery aser anü tashi (solar) amshia gari jajar. Aji oda, ali telong nung atsüngdena akaba totzü magima dang totzü melen totzü dang nungi tajungba aser jenjang dalangba nung amshitettsüsa temelen bushitetsübaji meimchirtem asoshi tayongzükba tuluka kümogo. Aji oda, tagitsüji, aji shibai mesüra shirnoki bushitetsü (?) ta asübaji asütsü, kechiyong alimaji parnok meyong asütsü. Tanü shitakba limajibo, asenok alima tila nung ochimashi tilala inyaka rongsen bendentsü merangba lima ya masü, saka tanü ama gari totzü nung jenjang atuba agi nübortem timtema aliba tia reprangteta, parnok anisüngzükdaksütsü asoshi petrol aser diesel totzü melen tajungba ka bushiteta agütsütsü merangtepba pur aliba limajiang shitak nisung aliba lima lir. Iba limaji asen lima asütsüla aser gari totzü petrol aser diesel melena amshitsüsa temelen tasen ka bushirtemji Naga nunger lanurtem rongnunga Aotsür Aor lanurtem asütsüla. Joko, otsüla oboula nunger temeteter kümer küm 150jungdi asür, saka tanü tashi gari nung petrol aser diesel enoktsüba sen dena otsüla oboula nungertem dang meshir. Aji oda, alima nung osettsüset ajak nung jenjang atur saka asenok temetetba jenjang nungbo matur, shisatsü mainer aser nübortem nungdak atema shisabolua mebilemer. Joko, tanü lanurtembo tsürabur rongsen dak metaloker malitsüla aser tsüraburtemia pei chirnur nungdak dang tali rongsen tebendentsü, ibaji parnok atema teyarir masü tashioktsür asütsü. Joko, tanü putu tasenba nung alir lanurtem atema shisabolujibo pei taküm aser kibong mesütsüba atema masü saka alima nübortem mesütsü bilemba shisabolu asütsüla.

## OLEMSABANG

### AO OSHI NUNG 'AZÜ' OJANGTEM KOWI LIR?

~ T. Meren Paul, Kohima

Asen Ao oshi zülujang asem aketba ojang rongnung 'Azü' ta asüba ya kasa ojang saka olasü palala aser ano karh nungbo olasüjia kasa saka tetetzü balala aika mesüra timba aketba ojang asütsü südi. Ao oshi sensaker ta, takar ta tatishitsü amshidang "Azü" ojang ya aikati amshir. Arok Osep nung 'Azü' ta amshiba ojang ajak agi 10 zülua angutsü aser tetetzü teratet agüja lir saka tetetzü karhbo kangabo mapensa anungji ni yangi tera metenloka züludangba / (front slash) sülen zülua angutsü. Dr. Clark-i 'ü' zülujang mamshi saka asenoki 'ü' amshia 'tsü' ta amshibaji pai bo 'tsy' ta 'y' amshia angur anungji Clark spelling bo 'Azü' masü 'Azy' ta zülur. Arok Osep nung aketba 'Azü' ajak agi ter yamai angur.

1. Azü- süoshi agi tobur junga sobutetba - matching. /jembishinü agi azü, kenten menü agi azü, jaja menja inyaksangshi agi azü - fine appearance
2. Azü- kidang metsüba shiruru - dog.
3. Azü- nisung kati ka dak sotba, azüit - hug. /tembar ajurutepdang tejak o tejak jeteba azütepba, pelatepba aser akumtsübo agutsüba yimya.
4. Azü- temang nung aliba azü - blood.
5. Azü- tejang tila tapu ka - sesame. / tsünüsempongtsü tapu ka, süngdong tahtsü nung adanger, tachitsü tesola, teromen tanep, chibijang dang tera tuluba, tereprangtsü sentüsü temoru.
6. Azü- kilem nung atongba ai ka - thatch. /tsünglu aser anü nungi kümzüksü asoshi kilem nung atongba süngotu tapak tila talang adokba tedong.
7. Azü- ayong nung tzü tarok aliba tesem, moti tarok - deep pool.
8. Azü- süngzü agi nalba - creeping twirl.
9. Azü- chibo longa oa meyipshi- turn around. /chi memokongi talem alitsü atema mimong anasa chi chibo wangdaka ayuba - placing the rice pot near the hearth to keep it warm.
10. Azü- tenük nung mokozü agi temtem agütsü - smoke in the eye. Ano item ojang 10 dak alia Arok Osep nung menoksemba ni asüngdangya-a angazüba aser bilemtetba karh metetsemtsü asoshi yangi zülusemer. Kasa ojang ano alitsü südi, karh-i medenloksema zülü nung lanu asensor tem ajangzüksü.
1. Azü- alu ronger külen mi agi junga morongdokba süng, süngoshi, tembang temer aser jahna ajak senmong nangdena bendener rongdokba dang alu azü ta ajar - collecting and burning debris in the jhum .
2. Azü- atsü anem akaba, azüzüka, asetzüka aluba, azü - inclination.
3. Azü- au marok, süng tajem ajok nateta takep sadoker tebor ajongtsü ayak tanak atokdaksütsü atema milak nung azü/arong - burning in fire to cause carbonized mark.
4. Azü- chitem aontem atemtsü asoshi am tu (banana leave) azüla-a tetsüna kümdaktsütsü milak nung aronger, am mi nung azü ta asür, scorching
5. Azü- lemjem nungi lenmang tai leni ao, lenmang azü/züa ao - missing the direction.
6. Azü- junga mena maso tera azü, süngjanglijang ano junga mamen tera azü - not well done cooked, not ripe but green.
7. Azü- mi jungjunga milak adoka mejangrudaktsüi mokozü maneni aika adokdaksüba, merila aser pezünü marotsü atema mokozü alongba, mokozü azü - bellowing smoke.
8. Azü- mongsen oshi agi totsüla/otsüla dang ajaba, azü - grandmother.
9. Azü- nati ninang tesepe (hornet nest) bushidang koya (rat) bener oagi nati nem chidaktsür aser pa shi achiba mapangji temang nung süngkum nungi asüzkükba renra temesüng alenloktsütsü aser nati jagi shiji nguzüka bener tesepe bushia yima aodangji pa dak alenloka aliba renra temesüngjagi pa koloni yima odir sayubaji ajioka yur pa tesepeji bushir, iba dangji koya agi nati azü ta ajar - pathfinder.
10. Azü- pongdang/bottle nung tzü shiokba/enokba, tagi nung süngo azü/züok, thermo flask nung tzü tatsük azü - pour.
11. Azü- shidak nung mamshi/metangshi, merangpong injang agi akah saka mekashi, lung agi aon saka monshi, züa ao, azü - missing the target.
12. Azü- makmanü yimya tamajung azü ama anguzüba nisung, azü -impudent.
13. Azü- tebang nung tzü/süngo züokba, süngo ajemba, azü - gulp.
14. Azü- temolungjang ayangba, tera rongka aitba, temolung azü - heart burning sensation.
15. Azü- tera kiraka/manga-a odaktsüba, tekolak azü-a alo - curve, bend.
16. Azü- tsürapuri tanur sayutetba yim asahdangba, junga tim-i azü ta, mesüra tim-i mazü ta jembir - grooming of children.
17. Azü- tanur kinü yepden nung mejangdaktsüdang talem agütsütsü atema teka agi azüa arur mesemtsüba, azü - embracing baby to induce sleep.
18. Azü- yimer kibong shia nem shijeb lemtsü, sorkar nungi jang aruba lemstu, saka lemyonga aodang kibong kar züdokba dang ki azü ta asür - by passed.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## NBCC Youth Week & Youth Sunday mungogo



**Dimapur, Chiteni/July 05 (TYO):** Nagaland Baptist Church Council (NBCC) kübok arogo ajak nung June 28 nungi July 04, 2021 tashi Youth Week & Youth Sunday mungogo.

Hopta tepiyong iba sentong agiba mapang sarasadem süngzü, kibong sarasadem aonungshi 7:00 ako nung, Sanitation Day nung süngdong/süngjangdong atemba, tekülem ki aser tetsüing lenmang mürekba, teintet rogo aser nungdabapur yaria ku mejeptsüba, tzi tatsüba, süng sotsüba, temezüing mejeptsüba, ki müreksüba mapa inyakba, July 04, 2021 (Deobarnü) Youth Day nung tetoktepa balala agiba liasü.

NBCC Youth Committee züingsemtem aser Association Youth Secretaries/Director/Coordinators temi Deobarnü nikongdang 5:00 ako nungi Virtual Worship sentong ka agia Youth Week aser Youth Sunday ya tembanga liasü, kong General Secretary, Asia Pacific Baptist Federation (APBF) Rev. Dr. Vesekhoyi (Vee) Tetseo o jembir liasü.

Pai "Stronger Together - HOPE" omen nungi jembir, koba Rom 8:24 nungi agizükba liasü. Pai ashiba agi, COVID-19 tashidak ajanga alima nung nisung ajak amai tim atemer.

Asen rongsenketsüing aser anogoshi lapaliru nung kanga shia kongshi, saka tamangertem

rongnung teimla ajanga maneni soita ayur, ta ashi. Yisu sülen anidaker asünung, timtem ajuruba mapang ain madoktsüla, kechiaser item timtem ya teti asoshi masü, ta pai ashi.

Sentong nung Youth Secretary, Nagaland Police Baptist Churches Association, Tsenbemo Ngullie ajanga Tsüingrem taochi agi parnok kumzükba indang kuli agütsü.

Iba sentong nung virtual worship ya NBCC Youth Secretary Rev. Vikuo Rhi ajanga anir agi, Kasheli Rotokha Youth Secretary of Sumi (SBAK) Nito Mount, Zunheboto ajanga Tsüingrem temoatsü jazüka sarasadem aser Gorkha Baptist Association (AGBCN) tenüing nung Tshering Lama ajanga tekülem sentong temeja ka agia liasü.

Chairman, NBCC Youth Committee aser Youth Secretary, WSBK Suhuto Chishi ajanga tatem o jembir liasü aser General Secretary, NBCC, Rev. Dr. Zelhoy Keyho ajanga sentong tembanga sarasadema liasü.

NBCC Youth Department ya 1937 nung tenzük aser tang iba kübok baptir alir lanir züingsem 2,12,306 lir.

## ANO GO ABEN TSÜNGREM DEN

### Ne tesangwa tali tesangwa akümer asü ?

*Saka temeshipur lenmangji anüpfung sangwa ama lir, kobai anüngdang matong tashi, tali sangwar.*

*A. Shin 4:18*

Apijemtsü Shin kaket zülur, Solomon shisa takatiba chuba liasü. Iba shisatsü kaket yagi temeshi taküm aliba tajangzük lemsateper aser shisa taka tamashi nisung den medemdanger aser temeshi nisung temenen nisung den medemdanger. Yangi pai ashir, "Tashi temetet tetenzükji ya; Tashitemetet nguang; aser nai kechisa ngudir nguaka tangatetba nguang" (t.7). Pai ashiba tetezüji kati shisatsü, pai/lai ibaji maka aser aji pai/lai nungdaker ta angatetsüla. Tamajung pur lemmangji amang mesüka lir saka temeshi pur lemmangji tesangwa lir (t.19). Nai anepdang anü adokba reprangra, idakji tamang lir, kodang züingya kümdir tesangwa tera yaloktsü aser anü jangja adoktsü aser anogoji maneni tesangwaba, tesangwaba akümtsü.

Iba amaji temeshipur dak ataloker. Atangji asenok shinga pei sasa temeshi mekümtet, saka nai aser ni Kibuba Yisu tenüing nung jara, asenok Pa temeshiba akatsü. Asen mera shiaji tejangjaba akümtsü kechiaser asenok lemmang nung Pa asenok den jajar, asenok taküm anir. Timtem tuokrong tia ajanga Pa asenok den lir ta asenoki metet aser Pai asenok asoshi tajungtibaji bener arutsü. T. Ken 119:105 ji bilemtetang, "Ne O kü tsüing asoshi milen, aser kü lenmang asoshi tesangwa lir." Asenoki Pa O asenok taküm nung mungdaksüra asenok koda temulung süa alitsü.

Oba, tanü kü tesangwa agi Na tushitsü aser sentsüwangshidaksütsü kü dang yariang ta mepishir. Amen.

## Northern India nung yimsü mechi pastor ka tepset

**New Delhi, Chiteni/July 05 (Agencies):** Northern India nung tawa tepuokdak nungi bail nung chiokba nisung kati pastor ka Bodhbarnü (June 30) tepset, shibai pa dang Yisu temeim aser taochi sayua liasü, ta osangtem ajanga ashi.

Karnal district, Haryana kübok Sangoi yimtsüing nungi Hindu nung Sonu Kashyap-i pastor Vinod Kumar dang aonung 8:00 ako meta süng agi azük, ta osang ajanga ashi.

Paongnung ya par kidang aliba tekülem kidang nungi online ajanga tekülem sentong agir lia pastor Vinod Kumar dangi Kashyap indang adianu kati yimdaklir shiranger ka semdangtsü aja, aser pa shirangsang'er ki yutsür aotsü lia azük, ta Pastor Kumar indang kinungtsüi ashi. La kinungbo ya pa indang motorbike atemloktsü lia Kashyap ya atsüka ata liasü, ta Sunita Kumar-i ashi.

"Vinod-i memeteti lia tesülen nungi azük. Pa motorbike nungi tusker lia tekolak nung asembe kanga sashia azük. Pa tekolakret zükpoka azük," ta lai Mornung Star News ajanga ashi.

Küm 25 tejangdang pastor Vinod Khrista dangi anir

arusang Senior Pastor Sompal Kalre-i ashiba agi, Pastor Kumar ya tasü ama ali nung lungdaka alidak Kashyap ya süng ka amer nokdaka aliba ama kidanger temi anungu. Parnoki idangjisa police nemo sang agütsü.

"Saka police tem arua matongdang yimdaklir temi Sonu apu aser azük tenzük. Mapang shidak nung police tem aru aser yimdaklir ket nungi Sonu kumzük. Police tem mapang shidak nung maru asünungbo Sonu ya tepseter lila," ta Pastor Kalre-i ashi.

Parnoki pastor Vinod ya anasa aliba mozüki kati anir ao, kong doctor temi pa süogo, ta sangdonga liasü.

Pastor Kumar ya Khrista magizükdak Hindu liasü. Tsükchitep kar ajanga tepset alitsü südi, ta police temi ashi, saka Sunita Kumar-i ashiba agi, pastor Kumar-i Kashyap den Tsüingrem indang ita ana ser tesadang jembia arua liasü, aser iba yongji pa ain adoka alitsü.

Kashyap-i mapang shia Pastor Kumar den par dokan nung ajurua liasü aser yangji Kumar-i Tsüingrem temeim, tatok agütsüba aser taochi indang jembia aru, ta Sunita Kumar-i ashi.

"Sarasademdaksütsü atema Kashyap mapang shia ozü kidangi aru aser temesepba mozü achiba nungi tekumzük angütsü atema pastor dang sarasademtsütsü asüngdang. Vinod tepsettsü pa molungjangi aruba ni mangateter," ta lai ashi.

Sadar police station nung Station Head Officer, Baljeet Singh-i Morning Star News dang ashiba agi, tsükchitep kar ajanga tepsetba lir aser tang asüngdangyaba mapang lir.

Kashyap tebu o pa adianu nati iba azüdokshi mapa inyaksü sentong miimbanga ayuba mechi police temi tena anema ken o benoka lir, ta Sunita Kumar-i ashi.

"Ibai sentong kanga junga yanglur inyakba mapa ka lir. Sonu adianu-i pa dak shiranger ka semdangtsü atema aja, aser yangji Vinod dak lendong agütsütsü Sonu renemer liasü," ta lai Morning Star News dang ashi.

"Sonu Kashyap-i Pastor Vinod tepsetba ya akhi tejen otsü kar ajanga alitsü südi, ta police temi ashidang yimdaklir aser police tsüingta mangatetep adoka liasü, kechiaser yimdaklir temi yangji mamang," ta Chandigarh pastor aser mentor Reji K. George ajanga

ashi.

Kashyap anema court nung ken o asem benoka lir, ta Pastor Kalre-i ashi.

Police temi Kashyap pua Sangoi nungi mile ti pilar aliba Sadar police station, Karnal nung First Informantion Report (FIR) benokba sülen court ka ajanga Kashyap ya tepuokdak hopta ana ayutsü totuyuba agütsü, ta Singh-i ashi.

Pastor Kumar tebu aser par adianurtemi pa temang ya kasa anogo Hindu nung yimya nung indok, kechiaser parnok ajak Hindu nung lir, ta Pastor Kalre-i ashi. Pa arishi küm 42 liasü.

Pastor Kumar aser pa kinungtsü na jala arishi küm 11 tain ka lir.

Pastor Kumar'er kibong nung Khristan pa kisüing liasü. Pa tsürabur aser adianu tebur pezüi pa dak mepelai liasü, ta Sunita Kumar-i ashi.

"Yimtsüing nung Pastor Sompal sülenbo Khrista agizükjeri Vinod dang liasü aser iba mapang pa kibong makum liasü. Par kinunger aser yimdaklir temi aiben pa anema nokdak, saka iba tia ajurutsü shingaia bilema meliasü," ta lai ashi.

Khrista agizüktsü

molungtetba sülen Pastor Kumar ya Rewari nung aliba Bible College ka nung training agi aser par yimdaki Tsüingrem wadang tenzüktsü asoshi meyipa ao.

Yimer ajungai pa akumtsüba liasü. Pastor Kumar ya yimtsüing nung shinga dena mangatetep mesüra nungsen-pangsen meliasü, ta yimtsüing nung tekolakba, Angrez Singh Saini-i ashi.

"Pa tenüing aser takum kuli tajung lir. Pai meimchir tenzükba liasü. Pai shinga tai memnadaksü aser shingaia pa sempa meliasü," ta Saini-i ashi.

Pastor Kumar ya Registered Medical Practitioner ka liasü, aser yimdaklir temi pa dang doctor ta aja. Pai shirangertem ki sema anepalua jaja, aser sen maliba shirangertem angati yari, ta paisa ashi.

Pastor Kumar asüpila sentong nung nisung 700 nungi 800 shi dena liasü. 1999 küm yimtsüing nung fellowship tenzükba den külemi pai yimtsüing 18 nung Tsüingrem mapa inyaka liasü, aser parnok ya par kidang adenshia Tsüingrem külema liasü.

Sunita Kumar-i la kinungbo mapa maneni inyaksü, ta ashi.

**OLONG PAITEP # 5866**

	1				2	3				
4			5							6
						7				
	8									
	9			10				11		
						12			13	
14										
						15				
		16								

<b>TIPILEN</b>		<b>LANGTSÜNGLEN</b>	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsüngda	
16. Tzü shiruru ka	- (4)	jatepba	- (4)

**OLONG PAITEP # 5865 TELANGZÜBA**

<b>TIPILEN :</b>		<b>LANGTSÜNGLEN :</b>	
1. Lemsä, 3. Osang, 5. Mezüng,		1. Lamén, 2. Sangken, 3. Omen,	
6. Agi, 7. Süra, 8. Tebutem,		4. Asüküm, 7. Sendong, 8. Tejang,	
9. Amen, 12. Odi, 13. Asayar,		10. Tanga, 11. Tazü.	
14. Angsü, 15. Agima.			

**YABO MELENSHIDI NI**

Whatsapp amshidang awashi yimya kar meteta alitsü indang zülur ni taoba küm tetenzüklen whatsapp group balala nung belenshia lemsaogo. Ajisüaka 24.06.2021 nü Tir Yimiyim nung Alokbai melenshidaktsünüa adianutsür kati züluba to ngur ni züluba ya-a Tir Yimiyim ajanga lemsatepner.

- T. Wati Longchar, Medziphema Town.

- Nai kechi lemsanüdir aji kanga junga jangja-jangja, raktet-rakteta, bentet-benteta, lutet-lutet, züngzünga zülur lemsatepang. Aser kodang nai aibelendir yakta tatok (apology) meshiang...iba jagi lümlüwa kanga tzüraseta alidang tzü temokong jemer tzüra atemba ama ajak molung süngzüka akümstsü.
- Telok rongnungi kar jembitsü sempet lir, kar zülutsü sempet lir & kar azüngtsü sempet lir. Anungji, telok nung shilem agitsü angazükang..tetenzü, nai tamaitüsü (smileys/ symbol) 😊👍👏👏 ka yokba ajanga iba telok nung alirtem ajaki naia telok züngshiba jangja metettsü.
- Züngsem kari nai maginüba & müreprangnüba yokyonga, telok sapang nungi odia/jakdaka maktesüdaktsü. Nüngdakra pa/la jurila whatsapp ajanga melenshijangma.
- Nü medemer masütsüa akok & nai junga metetta aliba niusng masütsüa akok...saka akok tashi tangari züluba/yokba sapuang...iba jaki pa/la ajungmesor tajung rongnung naa ka asütsü.
- Kodang-a iba sapang nung tangar mezüngshiba & mepelatsü o tebenok... iba jaki na awashi yimya maliba & sobaliba tangatetba maliba sayur.
- Asenok ajak whatsapp group balala nung züngsem lir. Anungji, tanga whatsapp group nungi aruba video clips, text msgs, voice msga & purapuji osang meyok tajungba. Message & video koba nung "forwarded many times" ta lidir ibaji nai asüngsashir teyok. Iba amala msg & videoji joko an chanu-i mechishitar (tetenzü kangasa tejen) ta metetang.
- Telok rongnungi whatsapp amshitsü tangazükdak pur alitsü akok. Anungji aibelen asüadang aremzüktepdi. Ano tanur tila alir ajanga whatsapp nung jangjungtsüa akok, itemji teloki aremzüka atadang tsüraburi repringshima awashitsü karangma. Asenok ajaki kati ka akhümtsüba, meimtepa shilem agitsü ayongzüker.

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Ketasen**  
(adv) meim, saklok (favour)  
· Kü tesayuri kü dak kanga ketasen.

**Ketdangpur**  
(n) lenirtem ( leaders, Incharge)  
\* Lokti senden nung **ketdangpur** tasen shimer.

**NAI-A YA METETTER MA?**

**NETFLIX SABANG AJANGA SAYUTSÜ ALIBA MOVIE ASER SERIES KAR: JULY 2021**

- (Yashi adok nungi...)
- Bankrolled - Netflix Film
  - Blood Red Sky - Netflix Film
  - Kingdom: Ashin of the North - Netflix Film
  - Masters of the Universe: Revelation - Netflix Series
  - Sky Rojo: Season 2 - Netflix Series
  - Charmed: Season 3
  - Django Unchained
  - The Walking Dead: Season 10
  - Wynonna Earp: Season 4
  - The Snitch Cartel: Origins - Netflix Series
  - Tattoo Redo - Netflix Series
  - Resort to Love - Netflix Film
  - Transformers: War for Cybertron Kingdom - Netflix Anime
  - The Last Mercenary - Netflix Film
  - Myth & Mogul: John DeLorean - Netflix Documentary

**TANÜBO NAI LANGZÜANG**

Q. Koba küm Digital India tenzük?  
A July 1st, 2015 B. July 1st, 2016 C. July 1st, 2017 D. July 1st, 2018  
(Taruba adok nung onoki langzütüsü)

**YASHI ADOK TELANGZÜBA: 10**

**SUDOKU # 5906 TELANGZÜBA # 5905**

	7	4	9		2	5	3		1	5	3	7	6	9	2	8	4
	6	2	8					4	8	4	7	2	5	3	9	6	1
	8		4	1	7	9	6	2	2	9	6	8	4	1	7	5	3
		7		2				6	5	3	2	1	7	6	8	4	9
4	5				9	2			4	1	9	3	8	2	6	7	5
	2				6		5	1	6	7	8	5	9	4	3	1	2
	3			5			4	9	9	8	1	4	2	7	5	3	6
		5	2		3	8		7	3	6	5	9	1	8	4	2	7
	9				4			5	7	2	4	6	3	5	1	9	8

**OJANG LUTEP # 5451**

- NDOLENG :
- AJUTSURÜ :
- BUBTSÜA :
- IAG :
- HIRSURU :
- SETTEPA :
- ONGBTARA :
- NLTEA :
- ÜJAAG :
- TOKKÜP :

**OJANG LUTEP TELANGZÜBA # 5450**

**KANGA SHISADANGA BILEM YONGJIA PEI INYAKBA YARI DANG AJANGZÜKTSÜ AKOK**

**TAN HOPTA ATEMA - KOMA SÜLA ?**

Q. Nagaland nung Naga nungerbo kibong nung tanur ajema asotsü atema masü aika asotsüang ajungshitep nung koma süla ?



Trinamool Bhawan, Kolkata nung taoba tir asür Pranab Mukherjee'er jabaso Abhijit Mukherjee (teyong) party nung adenba sülen Trinamool Congress Lok Sabha MP Sudip Bandopadhyay (tachichi) aser West Bengal Minister Partha Chatterjee (tabelen) nati pa agizükba noksa nung angur.

### Mumbai traffic police-i aibelenertem ket nungi sen crore 1 sarutet

**Mumbai, Chiteni/July 5 (Agencies):** Mumbai traffic police-i toba hopta ana tsüingda traffic senchi sarutsü atema ki shiai aoba sentong ka yongzükba sülen sen crore 1 sarutetogo. Aibelenalirtem dang senchi agütsütsü asoshi aiben mepeshiaka magütsüba sülen traffic police ketdangsürtemi kishiai oa senchi sarutsüsa aküm. Iba inyakyimkübok traffic police, constable anati temang nung camera inoker traffic tetuyuba nung manidakertem ki semdanga ao. Constable temi parnok dang senchi agütsütsü shia liasü.

Temang nung camera tem ya senchi meshiba mangaoktsü atema liasü. Ketdangsür kati ashiba agi, traffic police-i aibelener nisung 25,000 ki

semdangtsü asoshi nükjidong yur tenzük, shirnoki traffic department nem senchi sen crore 120 agütsütsü lir. Senchi sarutsü atema inyakyim tasen benoka inyakba kübok Mumbai traffic police-i team 25 tenteta, traffic temzüng ozüing nung aibelenertem shirnoki senchi magütsüi lir parnok dang nungi senchi meshir.

2016 küm yimti nung e-challan facility benokba sülen aibelenertem ket nungi senchi sarutsü atema traffic police ketdangsürtemi tetsükdaktsü aika ajangshia arudar. e-challan facility kübok traffic police-i aibelenertem nem slip agütsür aser digital modes ajanga senchi agizüker. Inyakyim ochishia bener aotsü atema e-challan ya

2016 küm benoka liasü. Taoba mapang police temi aibelenertem dang aibelen menaba tesem nung senchi chia liasü, saka tangbo challan ya aibelenertem dangi indang indanga aoer aser ibayongji senchi sarutsü atema tetsükdaktsü adoker.

2020 küm December ita traffic department-i aibelenertem jaok aser senchi aotsü mepeshia metetdaktsü. Iba mapang aibelenertem ket nungi sen crore 14 shi sarutet. RTO teyari nung traffic department-i aibelenertem indang licenses dena cancel sütsüogo.

Taoba mapang traffic police-i RTO dang senchi maotoki aliba aibelenertem nem gari ayoktsü atema temelaba magütsütsü mepeshiogo.

### TMC lenirtemi Tir Kovind den ajuruteb

**New Delhi, Chiteni/July 5 (Agencies):** West Bengal nungi Trinamool Congress (TMC) lenirtem telok kati Hombarnü Tir Ram Nath Kovind den ajuruteba India Solicitor General, Tushar Mehta mapa nungi agintsü khangogo. Sarada chit fund ken o aser Narada sting ken o nung aija alisang BJP lenir Suvendu Adhikari-i taoba hopta pa den ajuruteba aoba sülen SG mapa nungi agintsü khangogo.

Ken o anaprongla Central

Bureau of Investigation (CBI)-i achaayanger asünung TMC-i, Mehta shiba ken o bushitsüngdangba lokti nung special prosecutor ka lir pa inyakyim ajanga ochi mashi inyakyim densema liba sayur, ta ashi. Tir dangi tezüluba nung takhangba ka agütsüba nung TMC nungi MP Sukhendu Sekhar Ray aser Mahua Moitra natia, "Aija alisang aser ken o bushitsüngdangba lokti nem shisatsü agütsüsang SG na

ajurutebpa ajanga inyakyim mishidakba sayur. Iba amala senden ajanga criminal justice inyakyim mezüingmeshir aser judiciary dak nüburtemi tamang makateti akümer," ta ashi.

Kasa mapang nung Metha-ia ken o jangjashija, Bengal assembly nung Opposition lenir Adhikar-i pa nem jelia osang magütsüi par kidangi aru saka tanga maparen aliba ajanga pa den majuruteptet, ta ashi.

(Maneni tapak 9 nung...)

### CoWIN ya linük ajak nem lapoktsütsü: PM Modi

**New Delhi, Chiteni/July 5 (Agencies):** Ato Kilonser Modi-i Hombarnü, linük indang flagship Covid-19 vaccination application, CoWIN ya wara den raratsü atema digital system ajungkettsü meranga aliba linük ajak nem lapoktsütsü ta shiogo. "India indang Covid-19 vaccination atema technology sabang CoWIN ya ajak nem lapoktsütsü. Iba application ya linük mashika aser ajak nem agütsütsü. Iba sabang ajanga tang tashi nung vaccine dose million 350 agütsüogo," ta PM-i ashi.

Sorkari ayongzükba CoWIN global conclave nung jembiba mapang Ato Kilonseri iba osang metetdaktsü.

Modi-i, wara den rara nung ajak longjemer pei tajangshibatem lemsateptsüla, ta ashi. "Tetsüdaktsü liaka tajangshiba, inyakyim aser resource lemsateptsü bendanga agütsür lir. Covid den rara nung Technology yagi shilem tulu ka agir aser software dak sendakba nung tetsükdaktsü aika adoker. Onok indang Covid tracking aser tracing app

(Aarogya Setu) taoba küm lapoktsüogo. Wara den rara nung takok angutsü atema digitization adopt asütsü nüngdaker," ta pai ashi.

Paisa, India nung vaccine agütsüba sentong ya digital approach ka temulungdang yur yanglu, talisa Covid-19 vaccine dose jenjang asadanger yangluogo. "Dose ajak melalui amshitsü kanga tongtibang. Vaccine agiogo ta sayutsü atema paper ka sayutsü nüngdak madoker kechiyong ibaji online nung lir," ta Modi-i ashi.

PM-isa, local tenüngdakba apir CoWIN ya melenshia amshitetsü, ta ashi. RS Sharma, CEO, National Health Authority (NHA)-i taoba hopta, linük aikati iba vaccine agütsüba sabang amshitsü jangraba lemsatepogo, ta ashi.

Maneni PM-i alima ajunga nung Covid-19 tashidak agi asürtem den asükhu lemsatepogo. "Tajangshiba ajanga linük ka koda tashi tait südir süaka iba amala tetsükdangtsüka pei kicha agi mekoktetsü ta sayur," ta Ato Kilonser-i ashi.



Jabalpur nung arishi küm 33 tain ASHA worker Dolly Vanskar, aser lar chirtem vaccine distributor ka nem vaccine agütsütsü atema scooter nung mener aoba noksa nung angur. Vanskar-i taoba küm tenet tashi vaccine lemja arudar.

### Maharashtra assembly nung BJP MLA 12 suspend sütsü

**New Delhi, Chiteni/July 5 (Agencies):** Maharashtra legislative assembly nungi BJP MLA 12 küm ka atema suspend sütsüogo. Hombarnü speaker indang chamber nung presiding officer Bhaskar Jadhav dak mejungi benshiba atema state sorkari MLA tem aija liasü.

Speaker mezüingmeshiba aser pa dak teka sangshiba atema MLA 12 küm ka atema suspend sütsütsü asoshi resolution ka agizükogo.

Suspend sütsür aliba BJP MLA 12 rongnung Sanjay Kute, Ashish Shelar, Abhimanyu Pawar, Girish Mahajan, Atul Bhatkalkar, Parag Alavni, Harish Pimpale, Ram Satpute, Vijay Kumar Rawal, Yogesh Sagar, Narayan Kuche aser Kirtikumar Bangdia densema lir.

Maharashtra assembly anogo ana atema monsoon session mepetmesü tulu adoka tanü tenzükogo aser opposition lenir Devendra Fadnavis-i state sorkar dak rangloker MPSC kaketshir ka soseta astüba aser

session kanga atsüraba ken o benoka liasü.

BJP lenir-i, ken o balala benoktsü atema legislative tool tem ajak House züingsemtem nem agütsütsü aser tasüngdangba ajak atema telanzüba agütsütsü khang liasü.

MLA tem suspend sütsütsü atema ken o ya Parliamentary affairs minister Anil Parab-i benok aser voice vote ka ajanga agizüka ayu.

Suspend sütsür aliba mapang MLA 12 ya Mumbai aser Nagpur nung Legislature premises-i aittsü memelatsü.

Iba telemtetba agiba aija, Devendra Fadnavis-i anir BJP züingsemtemi, House inyakyim nung opposition-i shilem magitsü ta ashi.

"Opposition nung nütsüing ajemdaktsütsü atema teyazü tai tongloktsüogo, kechiyong onoki local bodies nung OBC quota indang sorkari teyazü benokba temai adokdaktsü," ta Fadnavis-i ashi.



Punjab nung sorkari ozüing alema mozü agütsüba anema Chandigarh nung Bharatiya Janata Yuva Morcha (BJYM) züingsemtemi longkak aiba mapang police temi parnok mintoktsü atema water cannons amshiba noksa nung angur.



Thailand kübok Samut Prakan province nung lendong tulu ka atalokba sülen Firefighter tem mapa inyakba noksa nung angur. Bangkok tezülen factory ka nung langka apokba sülen temeket nung ki aika raksa aser iba ajanga chemical arongba nungi meim adoktsü ta tsübua nübürtem aninogo.

## Afghan sepai 1,000 dak tema Tajikistan-i jena ao

**Dushanbe, Chiteni/July 5 (Agencies):** Taliban den rara adokba sülen Hombar anepdang Afghan sepai 1000 dak tema kidanger linük Tajikistan-i jenaogo, ta national security committee-i ashi. US aser bendanger sepaitem Afghanistan nungi atsüingnba mapang Taliban telungpurtemi linük anüdok tiplen tesem aika maka odar aser taoba ita Tajikistan-i aiba lenmang tongtiba dena atsüingogo. Hombarnü Tajikistan, national security committee-i, Deobarnü aonung Taliba den rara adokba

sülen afghan sorkar sepai 1,037 parnok taküm kümzüksü atema Tajikistan-i jena aitogo, ta metetdaksü. "Kidanger linük asüba temulung dang ayuba den Afghanistan telung ken o nung mejushitsü atema tangatetba dak ajemdaker Afghan government forces nungi sepaitem Tajik litsüi aittsü temelaba agütsüogo," ta committee-i ashiba Tajikistan indang state information agency Khovar-i sangdonga liasü. Kasa sangdong ajangsa Taliban-i Tajikistan aser

Afghanistan na arrtsü nung aliba Badakhshan province kübok district trokbo atsüingatokogo, ta metetdaksü. May ita tetenzüklen nungi Taliba-i tesem balala makyonga aoba sülen Afghan nunger sepaitem noklang aika Tajikistan-i jena iogo. Telungpurtem yagi Afghanistan nung district aika atsüingogo aser iba ajanga US aser bendanger sepaitem ajak September ita tashi nung linük nungi atsüingnba sülen Afghan military chireptsü ta tsübua bilemer.

## Indonesia nung COVID-19 atema Telemedicine service agütsütsü

**Jakarta, Chiteni/July 5 (Agencies):** Indonesia-i, tashidak keta aliba temaitsü terara sayuba coronavirus agi shirangertem nem angati telemedicine services agütsütsü. Healthcare sector nem anisüingzük agütsütsü nükjidong nung iba jenjang agiogo. Taoba hopta anogo timba ka nisung aika dak tashidak potetba den kününübo nisung 500 dak tema asüba sülen Asia linüktem rongnung Indonesia COVID-19 agi kanga mejungi kongshir lir. Alodokter aser Halodoc amala telehealth firm temi Mongolbarnü nungi tenzuka remote services agütsütsü, kong angati consultations aser mozü delivery densema lir, ta Health Minister Budi Gunadi Sadikin-i sangdong ka ajanga metetdaksü. "COVID-19 tashidak menar alirtem mozükidang mapang talangka ataa magüzüi medical services mapang shidak nung agitetsü aser iba ajanga mozükitem nung tashidak kanga mejungi tonger alirtem

tajungtiba yaritetsü," ta pai ashi. Finance Minister Sri Mulyani Indrawati-i Hombarnü ashiba agi, coronavirus anepalutsü, tendangtsü, bushitsüingdangtsü, mozü, vaccine aser protective gear atema ano rupiah trillion 193.93 ajungkettsü. July 2 nü tashi nung mozükidang yipden shilem 75 bo sünger liasü, ta health ministry-i ashi, ajisüaka linük yimtiba Jakarta densema Java amala asetkongtem nungbo mozüki shilem 90 mekazüker liasü. Kasa mapang nung oxygen agi anüingba osang dena metetdaksüogo, koba ketdangsurtemi ashiba agi, lemyalemku nung tetsükdaksü adokba aser production capacity ishika dang asüba ajanga lir. Java nung Sardjito hospital sangdong ka ajanga ashiba agi, hopta tatemi oxygen agi anüingba akümba ajanga shiranger 63 asü, ajisüaka otongdar-i asürtem ajak ya corona agi asü masü iba indang osang tejangja magütsü.

## Covid wara mapang ni tepuokdaki yokbaji tasüi yokba den kasa: Zuma

**Johannesburg, Chiteni/July 5 (Agencies):** Taoba South Africa tir Jacob Zuma-i, covid wara pokteter aliba mapang pa amala tambur ka tepuokdaki yokbaji tasüi yokba den kasa ta shiogo. Ita 15 tepuokdak mapang intoktsü atema police ket nung bendanga agütsütsü asoshi linük okadak tongtibai tetuyuba agütsüba sülen Deobarnü nikongtsütsü pai Nkandla nung par kidang osangbenertem den sensaksemba sentong ka ayongzuka agia liasü. "Ni ama tambur ka wara pokteter aliba teyalong nung tepuokdaki yokbaji tasüi yokba den kasa dang. South Africa nung tasüba agi temerenshi agütsütsü ya ozüing alema ta 1995 küm sangdongogo" ta pai ashi. Honibarnü Constitutional Court-i, parnoki obendanga agütsür aliba agintsü asoshi Zuma-i mepeshiba angadangtsü asoshi mulunga agizükogo. Taoba tir-i, pa arishi küm 79 ajungba indang shisemba den temang nung timtem aliba aser ano tanga kuli balala agüja liasü. Ken o ya July 12 nü angadangtsü aser iba anogo matong tashi pa tepuokdak mayutsü. Osangbener den sensaksemba mapang osangbenertemi Zuma dang, pai kechiba pa pusemertemi covid dak sendakba tenokdangba agütsür aliba rongnung lokti madenshitsu aser nisung ajak mask asemtsü atema tetuyuba agütsür aliba sülen manidakba atema maitsür, ta asüingdangba

mapang Zuma-i iba tasüingdangba paitoka jembitsü merang. Anogo ishika par kima pa pusemertem sobaliba hadirtem bener longkak aitar, parnok rongnung karibo anüing nung injang dena khatokogo aser iba ajanga tensa aziöktsü atema yoka aliba police tema atsüingintsüsa aküm. Zuma tepuokdaki anir ora azütokshi lendong adoktsü ta pa pusemertem kari amokmerendar. South Africa nung tang Covid-19 tashidak kanga kara menatepyonga aoba mapang ka nung nübürtemi tenokdangba agütsür aliba sülen manidakba police temi mazüoktetba atema nübürtem aika mepelar. Kasa mapang nung Zuma-i iba maongka agia pa pusemertem dang temzüing ozüing akhümsübuttsü atema mashiba atema nübürtem kanga mepelar. "Linük nung covid dak sendakba nung ozüing benoker alibatem sülen anidakdaksütsü atema lenir ka ama Zuma khuret lir," ta African National Congress lenir tejen Mvuso Msimang-i ashi. "Pai, nübürtem aser loktitentet dang lokti anidena anir marutsü atema ashitsu nüngdaker. Zuma-i ashiba agi, nübürtem meit adoker anungji parnok nem ozüing raksadaktsütsü aser tashidak mendaktsütsüla. Iba ya lenisüba tamajung," ta Msimang-i ashi. Zuma-i, lockdown dak sendakba nung tetuyubatem

densema tang ataloker aliba tensa ya apartheid benoka aliba putu den kasa ta shiogo. Commission of Inquiry matsüingdang nokdaksü atema aiben memulungba sülen ochi obendang ka asoshi pa nem maongka magütsür, ta Zuma-i shia arudar. Commission nung tenük kuli agütsürtemi Zuma ochi mashi ken o balala nung densema aliba sayuogo, aser talisa pa Gupta adianu Atul, Ajay aser Rajesh nunger den tesendaktep tajung aliba ajanga tali jangjatsür. Atul, Ajay aser Rajesh nunger ya linük meyong rand billion aika mashiymi alozuka agiba atema aitsür lir.

Gupta'er kibong ya tang Dubai nung oa jenoka alitsü ta amanger aser South Africa-i obendangtsü atema parnok meyipa anir arutsü inyaktep tenzükogo. Taoba mapang Commission mendenbuba Deputy Chief Justice Raymond Zondo-i, Zuma anema ken o benoker alibatem telanzüba agütsütsü asoshi aiben maongka agütsüogo, saka pai magizük. "South Africa tanaben apartheid mesükba yimsüsüba dangi meyipa odar ta shisabulua bilemer. Ni o mebendangi mapang talanglang sota ayur. Linük nung tang level four lockdown ka benoka lir, koba

1980s mapang emergency aser curfew den mesükteper. Tebendangji asenoki detention melena contempt of court amala balala benoka inyaksangshir, koba kasa dang lir. Ken o mangadangi tepuokdak ayubaji ken o mangadangi apartheid detention den kasa," ta pai ashi. Zuma-isa, pa tepuokdaki aotsü tsübua mali ta shiogo. "Kü dak dang ajak keta lir asübo kü tamangba dak ajemdaker tanüa ni tanaben tepuokdaki ila. Saka ni kü kicha kodanga inyaksangshi masür anungji kinunger aser külem tenzükertem tebilemdangba agi ni anir," ta pai ashi.



Sorkari Istanbul Convention nungi atsüingintsü telemtetba agiba sülen Istanbul nung tetsürtemi placards amer longkak aitba noksa nung angur. Tetsürtem nem tekümzükba agütsütsü asoshi tenangzüktepba yangluba nungi Turkey July 1 nü atsüingina liasü, ajisüaka tir Recep Tayyip Erdogan-i iba ajanga tetsürtem langtsüingi malutsü ta shiogo.

## Khukiye yimtsüng nung COVID-19 vaccine agütsüjemogo



**Dimapur, Chiteni/July 05, 2021 (TYO):** Satakha Block kübok Khukiye yimtsüng nung 13/06/2021 anogo mezüng COVID vaccination drive agiogo. Iba drive mapang, shiranga/temang nung timtem alir nisung ishika dak alaka, temsüa alir ajak nem vaccine agüja liasü, ta sangdong ka ajanga metetdaksü.

Iba dak sendakba nung,

Khukiye yimtsüng indang GB's aser tantsü tambu temi, vaccine noklang shilem ayimjema agiba yimtsüng ka kümdaktsütsü temulungtetba tulu nung, temsüa alir ajak vaccine agidaktsütsü lemtet.

20/06/2021 aser 4/07/2021 nü Dr. Mulasato Keyho, MO aser Dr. Alvis, MO CHC Satakha nati anir medical staff team kati iba yimtsüng semdang

asertemsüa alir rongnung tanüngba züngsem 37 nem vaccine agütsü. GB's, VCC aser VHC matsüngdang iba vaccination drive agia liasü.

Khukiye yimtsüng nung shilem asem lemsar vaccination campaign agiba mapang, temsüa alir nisung 128 nem Covid-19 vaccine mezüng dose agütsüjemogo, ta sangdong nung shia lir.

## Haqdarshak-i tangalen nungi arur ayangertem yaridar

**Dimapur, Chiteni/July 05, 2021 (TYO):** Temsüa alir sensopurtem nem central scheme tem shitak agütsütsü asoshi, Haqdarshak tentet ajanga maparen achaayanga inyadkaki. Iba tentet yagi State 20 nung inyakdar aser tang parnok mapatong kübok Nagaland bendenlokogo.

Entrepreneur tem atema MSME documents aser schemes nung project ka tenzüksütsü asoshi,

Entrepreneurs Associates Nagaland aser Acumen den teka amteper inyakdar. Kasa mapang, Nagaland densema linük tesem ajunga nung PANI project ta nüngja agütsüba PANI tentet den maparen inyakdar. Iba mapatong ajanga tangalen nungi arur ayangertem aser jila tesem nung alir ayangertem atema COVID vaccination aser Central Life Insurance scheme: PM Jeevan Jyoti Beema Yojana (arishi küm 18-50 tashi)

agütsütsü nükjidong yur inyaker. Honibarnü (03.07.2021), Department of Health & Family Welfare den longjemer Medical College construction site nung inyakertem/ayangertem atema Haqdarshak-i vaccination drive ka ayongzüka liasü. Iba vaccination drive mapang, ayanger 132 nem Covid-19 vaccine mezüng dose agütsüogo. Kasa mapang, PMJJBY scheme atema apply asütsü jangra alir ayangertem yariogo.

## Pfutsero nung vaccination drive agi

**Kiphire, Chiteni/July 05, 2021 (TYO):** Nübur ajangzükdaktsütsü aser Covid-19 wara menatsü lendongbang nung alirtem kümzüka yutsütsü mechi, Block Task Force on COVID-19, Pfutsero-i July 02 nungi July 04, 2021 tashi Pfutsero Town Sports Complex nung, anogo asem tapi agi Covid-19 tendangba aser iba den repsema vaccination drive ayonga agiogo, ta sangdong ka ajanga metetdaksü.

Mezüng anogo ana tashi, Pfutsero-Phek aser Kohima-

Jessami tsüngda lenmang yanglurtem atema COVID 19 Random Testing aser Vaccination Session achaayanga agia liasü.


Deobarnü (04.07.2021), Dokan kibur, Taxi driver, süngolemba/süngjanglijang belener aser nüburtem atema Special Vaccination Drive ayongzüksü.

Anogo asem tashi tapi agi Covid-19 tendanga aser vaccination drive agiba mapang, nisung 738 tashi tendanga vaccine agütsüogo.

Iba campaign agiba piyong,

health workers aser frontline workers tem chiyongdaktsüba atema, BTF-i Immanuel Baptist Church, Rukizu Baptist Church aser Calvary Baptist Church dang pelaba metetdaksü.

Kasa mapang, KALOS Society Traders Union aser Pfutsero Town nungi lokti tentet balalai BTF maparen nung nungita yariogo. Iba den külemi 14 Assam Rifles, Pfutsero Company ajanga tent house tem renemtsüba asoshi, BTF-isa item telok dang pelaba shisem, ta sangdong nung shia lir.



Changtongya, Chiteni/July 05, 2021: Mokokchung District nung Changtongya Sub-Division kübok Hombarnü (05.07.2021) Yaongyimsen aser Nukshiyim yimtsüng nung temsüa alir ajak - arishi küm 18 nungi temapur nem Covid-19 vaccine agütsüjemogo. Kasa mapang, iba Sub-Division kübok Covid-19 vaccine ayimjema agütsüba mezüng yimtsüng rongnung Yaongyimsen aser Nukshiyim kümogo. Village council aser arogo lennirtem matsüngdang, iba vaccination drive agia liasü. Community Health Center, CDPO aser NSRLM RD Block Changtongya teyari ajanga yimtsüng anaprongla nung vaccine agütsüba maparen takok ngua agiogo, ta sangdong ka ajanga metetdaksü.

## TEPELA MULUNGNEN O



1936 - 2021

Kodanga amatsü makokba onok asoshi Akhümtong, Timtem ajak aremla, Tasütait aser Temeim agi onok teti amokpanger alila Ojala Asür Wt. **Pipomenla Longkümsür** (Chuchuyimlang), mapang tatsüka shirangdang nungi 1st July nü La ajungbena iba Akumli wadang tempangba mapang aser Lepko amongba anogotem tashi onok temolung zürepa mangyim jashi nung alidang aria bilemba molungsentsü bener Nebo, Rongsen, Shisatsü aser Sarasadem den Temeim mapa yimya balala agi Kija/Kibongtem shirnokisa yaritepogo nenok ajak dang kangasa pelaba metetdaksür.

Onoki tsüngdong arua nenok dang pelaba meshiaka nenok Temeim mapa tajungtem onok molungjang nung teti alitsü. Ajioda asen Teyanglur Tsüngremi maneni nenok ajak moajangma ta ozü sarasadem.

*Temeim Chirnurtem, Semchirtem & Kinüngertem.*

Office of the  
**Village Council Settsü**  
Mokokchung : Nagaland

## TEPELA LEMSATEPER

Tanü asen lima tejakleni aoba den külemi meimchir tangatetba ulura angudang Tsüngrem tenüng asanger. Alima wara tongpang tulu (Covid-19 second wave), agi Settsü lima nüburtem timtem aser shisabulu nung alidang, ibai arok khuret ta angateta kija, kibong aser lokti tentet balala shirnokisa shisatsü, nübu, nüngdakba osettsüset, rongsen aser sarasadem agi yaritepogo, nenok ajak dang yimti nüburtem ajak tenüng nung pelaba lemsateper.

1. Settsü Baptist Arogo
2. Shri. Sharingain Longkumer Hon'ble Speaker, Nagaland Legislative assembly
3. Er. & Mrs. S.Subong Longkumer, Kohima
4. CMO Office, Mokokchung
5. Mr & Mrs. Metongmeren

Yamaji teyaritep tulu anguba den külemi yimti nüburtem ajaki tashi angaa tangatetba tajung agi tongpang wara tanü tashi azüoka kokteta arudaki. Asen Teyanglur Tsüngremi maneni yimti nüburtem ajak kümzüka moajangma.

Sd/-  
Task Force (Covid-19)  
Settsü

Sd/-  
M.Moa Lkr  
Chairman  
Village Council Settsü

## TMC lenirtemi Tir... (Tapak 7 nungi...)

Mehta-i ashiba o aija mapa nungi anentsü akhanger Trinamool MP Mohua Moitra-i, aser SG mapa nungi manenra tir-"appointment meyanglui nisung i bushitsüngdanga jenjang tapet mashi ka SG'er kidangi oa coffee agitsü imlar," ta lai ashi.

July 1 nü senden amenba ya ken o dak sendakba nung asüngdang. obendang agütsütsü aliba meleshidaktsütsü asoshi liasü ta pusema amenba dang masü saka shia TMC-i tir dang Solicitor General of India mapa nungi dak sendakba nung tetsükdaksü Tushar Mehta agina India adoker, ajisüaka SG-isa aija alir ka par kidangi anioka senden temzüng ozüng ajungkettsü menogo. TMC-i SG tangsa tang mepeshia metetdaksüogo.

## Stafanie Taylor-i otsü tasen yangluogo



**New Delhi, Chiteni/July 05, 2021 (Agencies):** Tetsür Cricket tsütsü Stafanie Taylor-i Deobarnü otsü yanglua, T20Is asayamung nung lai hat-trick agiba sülen, iba alizüing tongteter West Indies tetsür cricket asayar rongnung la tanabuba kümogo.

Sir Vivian Richards Stadium nung West Indies aser Pakistan na tsüingda T20I tasembuba aser final asayaba mapang, West Indies captain Stefanie-i iba alizüing tongtet. Final asaya nung Taylor-i Pakistan tetsür team nungi Fatima Sana, Diana Baig aser Anam Amin nunger out sütsü aser la nem lemzüktüba over nung run 17 dang agüja wicket 4 tashi out sütsü.

2018 küm, South Africa den

asayaba mapang, West Indies tetsür team atema Anisa Mohammed-i mezüing hat-trick agia lir. Iba asaya mapang, Anisa-i over 4 nung run 24 agütsü aser wicket 3 out sütsü.

Deobarnü, West Indies aser Pakistan tsüingda T20I tasembuba aser final nung, Taylor-i tanabuba innings nung run 43 meyangludang, lai wicket pezü agi. West Indies-i wicket trok agi Pakistan tsükdaktsü.

Iba takok den, West Indies puri Pakistan madak 3-0 agi iba series takok nguogo. Asayamung ayonger telok - West Indies-i over 20 nung Pakistan team nem run 102 dang agütsü aser asayar ajak out sütsü. Iba sülen, tanabuba innings nung, over 20 atemtsü ball 5 anünga lia, West Indies

team-i alizüing tongteta iba series akok.

Tanabuba innings nung run 103 tongtettsü atema West Indies puri asaya tenzük, saka kanga dang kara over tanabuba nung opener, Hayley Matthews out süadok. Diana Baig-i Hayley indang wicket (catch) agi.

Tanabuba over nung Anam Amin-i Hayley dangi aon, koba lai zülöktsüba ball ali matongdang Diana-i ajepzük. Iba sülen, Diana-i tasembuba over ona liasü.

Diana indang over nung, Deandra Dottin-i 4' ka aser six' ka züklokttsü, saka laisa Dottin out sütsü. Diana-i aonba ball ka Dottin-i indang indanga zülöktsü, koba wicket adena metukudang, Diana-i ball ji ajepzük.

Over tasembuba indang ball tatembuba nung, Diana-i Kyshona Knight dangi yok, koba Knight-i ball dak peta zükshi aser ali matongdang wicket-keeper Sidra Nawaz-i ball ji apu.

West Indies pur mapang tatsüka tashi run junga yanglua aliba mapang, Nida Dar-i Chedean Nation out sütsü. Over 12 nung, West Indies team run 58 yanglua wicket pezü tashi out süadok.

Ajisüaka, Taylor (43\*) aser Kycia Knight (24\*) naprongla out mesüi tatem tashi asaya team atema run 48 bendenloktsüba yong, asaya atema ball pungo anünga lia, parnoki iba asaya koktet.

## T20 World Cup jakdang IPL ajanga 'pitch' raksatsütsü akok: Mark Boucher



**New Delhi, Chiteni/July 05, 2021 (Agencies):** United Arab Emirates nung tanüingba Indian Premier League asayaba ajanga pitch' tem kanga mejungi akümtsü, koba raksatsü akok aser iba jagi ICC T20 World Cup mapang spinner tem kanga yaritsü, ta South Africa head coach Mark Boucher-i bilemba ka lemsatep.

2021 IPL, koba asayamung ayongba tesem indang bio bubble telungtet nung züingsem kar dak COVID-19 tashidak putetba ajanga thitenja liasü, iba League tanüingba match ajak UAE nung asayatsü. Iba League temer sülen, kasa

tesem nung T20 World Cup ayongzüktsü terenemba lir. India nung Covid-19 wara junga süshia maoba asanangteta, T20 World Cup asayamung India nungi UAE belener aotsü ICC-i lemte.

Thitemtsür aliba IPL indang leg tanabuba ya September 19 nungi October 15, 2021 tashi asayatsü. Iba sülen October 17, 2021 nü T20 World Cup tenzüktsü.

"IPL sülen wicket tem agütsü tera tasak asütsü. South Africa nung run 180 nungi 200 tashi yangluteta asayaba ama pitch jenjang kasabo masütsü. Nai tasa balala amshia asayatsüla

aser kümdanga jeretpera asayatsüla," ta Boucher-i ashi.

"Asayamung kar subcontinent tashi belener oa asayatsüsa kümra, asaya jenjang balaka ajangshitsü. T20 World Cup ayongzüktsü aliba tesem (UAE) ka nung IPL asayatsü asünung, idakji moapu aika mali aser item pitch raksadoktsü; ajasünung team temi bilemba ama run aika meyanglutettsü," ta pai ashi.

Boucher-i ashiba agi item pitch (UAE) nung batting asayatsü tasak asütsü aser spinner tem atema maongka asütsü.

"Asenoki ngudanga aser ajangshia lir asünung, bat asütsü kanga tasak akümtsü. IPL repringner sülen, World Cup asaya mezüing shilem indang score ajanga asenoki tasa angütsü," ta Boucher-i ashi.

"Spinner temi shilem tuluka agütsü ama nibo bilemer," ta Boucher-i shisem.

Maneni, St George's, Grenada kübok National Cricket Stadium nung ayonga asayaba T20I series nung South Africa-i West Indies madak 3-2 agi series kokogo. Iba asayamung nung Left-arm spinner Tabraiz Shamsi-i wicket 7 tashi out sütsü.

## Tokyo 2020: Australia-i athlete 472 tashi yoktsü

**New Delhi, Chiteni/July 05, 2021 (Agencies):** Tokyo Olympics nung shilem agütsü atema, Australia-i athlete 472 yoktsü terenemba lir, koba 2004 Athens Games nung shilem agir külen nungi, linük ajanga bendangleni yokba team tulutiba rongnung tanabuba asütsü.

Hombarnü, Australian Olympic Committee-i ashiba agi, July 23 nungi tenzüka asayatsü aliba Games atema athlete - tetsür 254 aser tebur 218 tashi Tokyo-i yoktsü. Athens asayamung nung, Australia-i athlete 482 tashi yoka lir.

Tetsür tennis nung world no. 1 Ash Barty ya Australian team nung Indigenous athlete 16 rongnung dena lir.

Australia team-i Olympic saisapong tasen pezü - karate, skateboarding, sport climbing aser surfing densema saisapong 33 nung tokteptsü.

Team chef de mission, Ian Chesterman-i ashiba agi, Covid-19 tenokdangba ajanga küm ka tashi Olympics asayatsü anogo atsülangba, tetoktepba balala magitetba, qualifying

asayamung nung shilem agütsü maongka manguba aser training tesem tashi senzüsenbongtsü nokdangba ajak, shimteta alir athlete temi arenzüka aruogo.

"Athlete ajak iba tensa ajanga kanga timtemogo aser parnok asayar shia tebilemba balala lir. Ajisüaka, temlungtetba tulu nung, parnoki Tokyo-i aotsü lemtetogo," ta Chesterman-i ashi.

Aruya aliba Olympics nung, Australia team nungi tetsür athlete shilem - 53.5% timba asütsü, koba 2016 küm Rio de Janeiro nung tetsür athlete shilem 50.90% dang nungi timba asütsü.

Iba team nung Australia nunger Olympic tetokteper rongnung tantsüla - arishi küm 66 tain Mary Hanna-i equestrian (dressage) nung shilem agütsü terenemba lir. Ano külen, Equestrian Andrew Hoy, shibai 'eventing' nung shilem agir, pai Olympic asayamung 8buba nung shilem agiba angütsü.

Australia indang team tuluba rongnung athletic asayatem alitsü, kong tetokteper 63 tashi asayatsü renema lir.

## Tokyo Games lapokba sentong nung Mary aser Manpreet nati linük wako amtsü



**New Delhi, Chiteni/July 05, 2021 (Agencies):** Tokyo Olympics, koba July 23 nungi tenzüktsü sentong renemdar, iba asayamung lapokba sentong nung, India team atema, trok ben world champion boxer, MC Mary Kom aser tebur hockey team captain Manpreet Singh nati India wako amtsü, ta Hombarnü Indian Olympic Association (IOA) sangdong ka ajanga metetdakttsü.

August 8, 2021 nü, kasa asayamung shibangba sentong nung, World Championships silver medal takok angur, wrestler Bajrang Punia-i linük wako amtsü.

Iba asayamung nung, Indian contingent' nungi athlete 126 aser ketdangsur 75 densema

züngsem 201 agi shilem agütsü. Indian contingent nung athlete - tebur shilem 56% aser tetsür shilem 44% dena lir, ta IOA-i metetdakttsü.

Iba contingent nung quota, 78 ngua lir aser athlete temi medal position 85 nung tokteptsü.

2012 London Games nung Mary Kom-i bronze medal takok anguba ajaki jangjaa lir aser taküm Tokyo Olympics nung lai tatembuba shilem agütsü. Ano külen, Manpreet-i 2012 London aser 2016 Rio Games nung shilem agir sülen tasembuba Olympics nung shilem agiba angütsü. Kasa mapang, Commonwealth aser Asian Games champion, Bajrang-i tan Olympics nung mezüing shilem agütsü terenemba lir.

### **BILEMDANGANG**

**"Kechi ken o mimshidir, ajak asoshi iba ken o ji tongtibang akümer."**